

2026 ЖЫЛДАН БАСТАП ШАҒЫН БИЗНЕС ҮШІН НЕ ӨЗГЕРЕДІ?

2026 жылдың қаңтарынан бастап жаңа Салық кодексі күшіне енеді. Жеңілдетілген декларация шеңберінде шағын бизнеске арналған бірыңғай біріктірілген режим енгізіледі. Бұл режим қазір қолданылып жүрген екі тәртіпті – жеңілдетілген декларация мен бөлшек салығын – біріктіреді. Жылдық шекті кіріс 600 мың АЕК-ке немесе 2,4 млрд теңгеге дейін болуға тиіс. Сонымен қатар жалдамалы қызметкерлер санына шектеу қойылмайды. Бұл туралы ОКҚ алаңында өткен баспасөз конференциясында ҚР ұлттық экономика вице-министрі Ерлан Сағынаев мәлімдеді.

Сонымен қатар егер жылдық кіріс 24 мың АЕК-тен асып кетсе, еңбекақы қорына жұмсалған қаражат есебінен салық салынатын табыс азайтылады. Жеңілдетілген режимді қолданатын салық төлеушілер ҚҚС пен әлеуметтік салық төлеушілері болып саналмайды.

«Өзін-өзі жұмыспен қамтыған азаматтар үшін жаңа жеңілдікті режим қарастырылған – 4% мөлшеріндегі бірыңғай минималды төлем. Оның ішіне ЖТС кірмейді. Бұл санаттағы азаматтар үшін жеке табыс салығы толықтай нөлге теңестірілді. Бірыңғай төлемнің құрамына міндетті зейнетақы жарналары, әлеуметтік аударымдар және МӘМС жарналары кіреді. Салық есептілігінің нысандары 30%-ға қысқарады. Сонымен қатар салық төлеушінің келісімімен декларацияларды автоматты түрде толтыру мүмкіндігі енгізілді. Жоспарлы тексерулерден толық бас тартылды. Жаңа жылдан бастап тексерулер тек тәуекелдерді басқару жүйесі негізінде ғана жүргізіледі», – деді Ерлан Сағынаев.

Микро және шағын бизнес үшін 2026 жылға дейінгі кезеңдер бойынша салықтық тексерулер мен камералық бақылау толығымен жойылады. Яғни, егер жыл ішіндегі міндеттемелердің жалпы сомасы 1 млн теңгеден аспаса, жер, көлік және мүлік салығы бойынша ағымдағы төлемдерді есептеу талаптары алынып тасталады. Сондай-ақ сенімді салық төлеушілер үшін кепілсіз және банк кепілдігінсіз мерзімін кейінге қалдыру немесе бөліп төлеу мүмкіндігі енгізіледі.

«2021 жылдан бастап елде кәсіпкерлік саласында жаңа реттеу саясаты аясында «таза парақтан реттеу» қағидағы енгізіліп келеді. 128 мың талаптың ішінде жаңа реттеу шарттарына сәйкес келмейтін 10 мыңнан астам талап жойылды. 2024 жылы түзетулердің екінші пакеті қабылданды. Біз тексеруден профилактикалық шараларға өтіп жатырмыз. Заңнамаға шамамен 400 өзгеріс енгізілетін болады», – деді спикер.

Бизнеске өкімшілік қысымды азайту мақсатында Smart Data Ukimet базасында «Гильотина» реттеу механизмі іске қосылды. Бұл – міндетті талаптар тізілімі, ол бизнеске тізілімнен шығарылған және уақытылы жойылмаған талаптарды бұзғаны үшін өкімшілік жауапкершіліктен босатуға мүмкіндік береді. Қазір өңірлік деңгейде де осындай түзету жұмыстары жүргізілуде. Атап айтқанда, бизнеске қатысты өңірлік талаптар қайта қаралды, жергілікті маңызы бар нормативтік-құқықтық актілердің базалық тізімі қалыптастырылды, жергілікті атқарушы органдар тарапынан міндетті талаптар тізілімін толықтыру кестесі бекітілді.

Вице-министрдің айтуынша, бизнеске өкімшілік жүктемені одан әрі төмендету мақсатында «Рұқсаттар және хабарламалар туралы» заңнама өзектілігін жоғалтқан рұқсаттарды алып тастау жоспарланып отыр.

«Айғақ»-ақпарат.



АЙҒАҚ

Gazet Qazaqstan Jymalstika Akademiasynyń "Altyn Juldyz", Qazaqstan Jymalster odaqynyń Turar RYSQULOV jáne Sattar ERÝBAEV atyndaǵy sylyqtarynyń, "Altyn júrek" sylyǵynyń iegeri



№49 /sársenbi/ 03 jeltosqan 2025 jyl

МЕМЛЕКЕТ БАСШЫСЫ ӘЛЕМ БІРІНШІЛІКТЕРІНДЕ ТОП ЖАРҒАН ЖАС ШАХМАТШЫЛАРМЕН КЕЗДЕСТІ



Кездесуге 8 жасқа дейінгі санатта әлем чемпиондары атанған Әдинұр Әділбек пен Алиша Бисалиева, 12 жасқа дейінгі санатта әлем чемпионы болған Данис

Қуандықұлы, 14 жасқа дейінгі санатта әлем біріншілігінде жеңіс тұғырынан көрінген Марк Смирнов, 16 жасқа дейінгі санат бойынша әлем чемпионатында

алтыннан алқа таққан Эдгар Мамедов, 16 жасқа дейінгі шахматшылар арасында әлем біріншілігінің күміс жүлдесіне қол жеткізген Сауат Нұрғалиев қатысты.

Мемлекет басшысының айтуынша, жас спортшылардың жетістіктері халықаралық аренада Қазақстанның мерейін үстем етеді әрі елімізде шахматтың келешегі зор екенін көрсетеді. Президент чемпиондардың биік мақсаттарға ұмтылуы қажеттігін жеткізіп, оларға жарқын жеңістер тіледі.

– Шахмат деген үлкен өнер. Сондықтан шахматпен күнделікті, мұқият, арнайы кітаптарды оқи отырып айналысу қажет. Халықаралық шахмат федерациясының президенті Аркадий Дворковичпен кездесіп отырсыздар. Бұл – Сіздердің бақытты сөзтеріңіздің бірі, – деді Мемлекет басшысы.

Кездесу соңында Қасым-Жомарт Тоқаев шахмат тақтасына естелік жазба қалдырды.

Ақорда.

ҚАЗАҚСТАН МЕН ӨЗБЕКСТАН БІРЛЕСКЕН ТУРЛАР АШАДЫ

Қазақстан Республикасының Премьер-министрі Олжас Бектеновтің тапсырмасын орындау аясында Қазақстан мен Өзбекстан арасындағы туризм және көлік байланыстарын дамыту жөніндегі жұмыстар күшейтілді.

Көлік министрлігі тарапынан үш жаңа әуе бағыты іске қосылады. Осы жылдың 1 желтоқсанынан бастап SCAT әуекомпаниясы Түркістан – Бұхара, Түркістан – Үргеніш (Хиуа) және Түркістан – Самарқанд бағыттары бойынша тұрақты ұшады. Рейстер әр бағыт бойынша аптасына үш рет орындалады. Билеттер сатуға шығарылды, ұшу құны – бір бағытқа 40 мың теңге.

Бастапқы кезеңде әуе қатынастары тұрақты жолаушылар ағынын қалыптастыру үшін субсидияланатын болады. Маршруттардың ашылуы туризмді дамытуға және Ұлы Жібек жолы қалаларын ілгерілетуге, сондай-ақ өңірлердің көлік байланысын күшейтуге және шетелдік туристер ағынын ынталандыруға бағытталған.

Сонымен қатар Туризм және спорт министрлігі Орталық Азияның Жібек жолы бойынша ортақ маршруттың жаңа тұжырымдамасын әзірледі. Оған аймақтағы негізгі қалалар: Алматы, Шымкент, Түркістан, Ташкент, Самарқанд, Бұхара және Хиуа кірді, сондай-ақ ортақ тарихи мұра мен табиғи ресурстар енгізілді.

Самарқандқа алғашқы тур компастур операторымен бірлесіп іске қосылды. Қазір басқа туристік компаниялармен жаңа турларды ұйымдастыру бойынша келіссөздер жүргізілуде.

2026 жылы екі елдің туристік ресурстарын біріктіру мақсатында Қазақстан мен Өзбекстанның туристік әлеуетін бірлесіп ілгерілету жоспарлануда.

Өңір туризмін түлететін сәулеттік жоба

Түркістан облысының әкімі Нұралхан Көшерөвтің төрағалығымен өңірде жүзеге асырылатын жаңа сәулеттік жобаларға арналған кеңейтілген жиын өтті. Күн тәртібінде Арыс пен Кентау қалаларындағы инфрақұрылымдық жаңартулар, сондай-ақ Түркістан қаласында салынуы жоспарланған бірқатар бастамалар жан-жақты қарастырылды.

Өңір басшысы жобаларды орындау барысында заманауи тенденциялармен үндесетін, бірегей әрі креативті идеяларды енгізу маңызды екенін атап өтті. Оның айтуынша, Түркістанның жалпы дизайн коды барлық аудан мен қалаға ортақ стиль қалыптастыруға бағытталуы тиіс.

– Аудандардың кіреберістерін безендіруде жаңа сәулеттік үлгілер ұсынылуы керек. Өңірдің туристік әлеуетін арттыру үшін шекара бекеттерінің айналасын, негізгі жолдардың бойын абаттандыру аса маңызды, – деді Нұралхан Көшерөв.

Жиында ерекше назар аударған жобалардың бірі – қазақы үлгідегі, киіз үйлермен көмкерілген жаңа концептідегі қонақүй кешені. Бұл нысан дәстүрлі қазақ мәдениетін заманауи архитектурамен ұштастырып, Түркістанға келетін туристер үшін айрықша атмосфера қалыптастыруды мақсат етеді. Сонымен қатар кеңесте Түркістан қаласына заманауи медициналық орталық салу, қаланың көркін ашатын шағын сәулеттік формаларды көбейту, билер аллеясын тұрғызу, ірі мәдени

іс-шараларға арналған Рәміздер алаңын салу, көшелер бойына жабайы жүзім егу арқылы жазы ыстық қалада табиғи көлеңке аймақтарын арттыру мәселелері талқыланды.

Сондай ақ, Арыс қаласына веложолдар салу мен кәсіпкер есебінен жаңа саябақ ашу, Кентаудағы базар аумағын ретке келтіру бастамалары да қолдау тауып, нақты ұсыныстар берілді.

Қазақы үлгідегі жаңа қонақүйдің салынуы Түркістан өңірінің туризм саласына бірнеше маңызды бағытта оң әсер етеді. Ең алдымен киіз үй элементтерімен көмкерілген қонақүй – қазақ мәдениетінің танымал брендіне айналып, шетелдік туристерге этникалық тәжірибе ұсынады.

Екіншіден, заманауи инфрақұрылым мен дәстүрлі нақышты үйлестірген нысандар туристер ағынын көбейтіп, өңірге жаңа аудитория тартады. Үшіншіден қонақүй қорының сапасын жақсарту

Бірегей дизайнға қонақүйлер жоғары деңгейдегі қызмет көрсетумен қосылып, Түркістанды халықаралық стандартқа сай туристік орталыққа айналдыруға үлес қосса, экономикалық белсенділікке серпін береді. Сондай-ақ, этноқауымдастықтар, қолөнер көрмелері, ұлттық ас мәзіріне арналған демалыс аймақтары туристерге қазақтың тұрмысын тереңірек таныстыру туризмді танытудың тағы бір ерекшелігі болары анық.

Ұлжан
ҚАСЫМЖАНҚЫЗЫ.